

通鑑綱目

卅六之上

隋

文帝

後主

51  
1  
56

庫文開内			
三三函	五九	漢	
一九架	九七冊	書	
	六七號	類	

漢書門

漢書門			
九七冊	一五	漢	
	九六	書	
	六七號	類	

内閣文庫	
番號	漢 5967
冊數	97 ( 56 )
函號	283 35

五十七



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



綴じ部(喉部分)の文字など開きが不鮮明な箇所あり



資治通鑑綱目卷之三十六

淺草文庫

起甲辰陳後主至德二年隋文帝開皇四年○盡丁卯隋煬帝大業三年 凡二十

四年

甲辰 陳至德二年 春正月朔日食 質實 日食注見新莽天鳳

元 梁主入朝于隋 隋頒甲子元曆

張賓劉暉等所造也

二月突厥達頭可汗降隋 質實 突厥北狄國名 注見梁武帝大

隋書卷之三十三 陳後主至德二年





同十一年 ○夏四月隋伐吐谷渾敗之

隋將軍賀婁子幹發五州兵擊吐谷渾克之  
隋主以隴西頻被寇掠而俗不設村塢命子  
幹勒民為堡仍營田積穀子幹上書曰隴西  
河右土曠民稀邊境未寧不可廣佃比見屯  
田之所獲少費多虛役人功卒逢踐暴且隴  
右之民以畜牧為事若更屯聚彌不自安但  
使鎮戍連接烽堠相望民雖散居必謂無慮  
隋主從之 **質實** 吐谷渾西  
見晉元帝建武元年隴西郡名注見秦王政  
三年寇掠注見漢光武建武十五年烽堠注  
見齊高帝建元四年

五月陳以江總為僕射 ○六月隋作廣通渠

隋主以渭水多沙深淺不常漕者苦之詔字  
文愷鑿渠引渭自大興城東至潼關三百餘  
里名廣通渠漕運 **質實** 渭水注見漢高帝五  
通利關內賴之 年大興城注同上十  
年萬年潼關注見漢獻帝建安十四年關  
內道名注見唐玄宗開元十一年京兆

秋八月陳將軍夏侯苗叛降于隋隋主弗納

陳將軍夏侯苗請降於  
隋隋主以通和弗納

九月隋詔公私文翰並宜實錄



隋主不喜辭華故有是詔時泗州刺史司馬  
幼之文表華艷詔付所司治罪治書侍御史  
李諤亦上書曰魏之三祖崇尚文詞遂成風  
俗江左奇梁其弊彌甚競一韻之奇爭一字  
之巧連篇累牘不出月露之形積案盈箱唯  
是風雲之狀世俗以之相高朝廷以之擢士  
以儒素為古拙以詞賦為君子故其文日繁  
其政日亂良由棄大聖之軌模構無用以為  
用也今朝廷雖有是詔而州縣仍踵弊風躬  
仁孝之行者不加收進工輕為之藝者舉送  
天朝請加采察送臺推初又言士大夫矜伐  
干進無復庸趾乞明加羅黜以懲風軌詔以  
其奏頒集覽收進收來取也實實泗州注見唐  
示四方也集覽也實實昭宗景福二

年李諤趙郡人魏之三祖平文帝廟號太  
祖昭成帝廟號高祖太武帝廟號世祖

### 與突厥和親

突厥沙鉢略可汗數為隋所敗乃請和親于  
金公主自請改姓楊氏為隋主女隋更封以  
為太義公主沙鉢略遣使致書自稱從天生  
大突厥天下賢聖天子沙鉢略可汗隋主復  
書曰大隋天子貽書大突厥沙鉢略可汗得  
書知大有善意既為沙鉢略婦翁今日視沙  
鉢略與兒子不異時遣大臣往彼省女復省  
沙鉢略也於是遣僕射虞慶則往使沙鉢略  
陳兵坐見慶則稱疾不能起長孫晟曰突厥  
與隋俱大國天子但可汗是大隋女婿奈何

通鑑綱目卷三十一 東後主至德二 三十一



不敬婦翁沙鉢略笑乃起拜頓顙跪受璽書以戴於首既而大慙與群下聚哭慶則要以稱臣沙鉢略謂左右曰何謂臣左右曰隋言臣猶此云奴耳沙鉢略曰得為大隋天子奴虞僕射之力也贈馬千匹以從妹妻之

**集覽**

要以稱臣要伊堯反勒也文穎曰要

**劫質實** 可汗注見漢後主景耀四年

### 冬十一月隋遣使如陳

隋主遣薛道衡等如陳戒之曰當識朕意勿以言辭相折

**質實**

薛道衡河東汾陰人

### 陳起臨春結綺望仙閣

陳主起三閣各高數十丈連延數十間皆以沉檀為之金玉珠翠為飾珠簾寶帳服玩瑰麗近古未有其下積石為山引水為池雜植花卉上自居臨春張貴妃居結綺龔孔二貴嬪居望仙複道往來以宮人袁大捨等為女學士江總雖為宰輔不親政務日與尚書孔範散騎王瑳等文士十餘人侍宴後庭謂之狎客使諸妃嬪及女學士與狎客共賦詩采其尤豔麗者被以新聲其曲有玉樹後庭花臨春樂等大畧皆美諸妃嬪之容色君臣酣歌自夕達旦張貴妃名麗華本兵家女性敏慧有神彩善候人主顏色又有厭魅之術置淫祠宮中聚女巫鼓舞百司啓奏並因宦者以進陳主置妃膝上共決之由是宦官近習



內外連結宗戚縱橫貨賂公行大臣有不從者因而譖之於是大臣皆從風諂附孔範與孔貴嬪結為兄妹陳主惡聞過失每有惡事範必曲為文飾稱揚贊美由是寵遇優渥言聽計從群臣有諫者輒以罪斥之中書舍人施文慶頗涉書史嘗事陳主於東宮聰敏強記明閑吏職大被親幸又薦所善沈客卿陽惠朗徐哲暨慧景等有吏能陳主皆擢用之客卿有口辯頗知典故惠朗慧景家本小吏考校簿領毫釐不差督責苛碎聚歛無厭士民嗟怨關市之稅歲入數十倍陳主大悅益以文慶為知人轉相汲引珥貂蟬者五十人孔範自謂文武才能舉朝莫及自陳主曰諸將起自行伍匹夫敵耳自是將帥微有過失

即奪其兵分配文吏由是文武解體以至覆滅

**集覽**

厭魅厭益涉反廣雅云厭鎮也

行符厭俗之謂魅暨慧景暨姓也音居乙反慧景其名珥貂蟬注見齊高帝建元二年解

體注見漢桓帝延熹二年質實一統志云臨春結綺望仙

縣治東北五里臺城內俱陳後主所建後主自居臨春張麗華居結綺龔孔二貴嬪居望

仙並靚粧臨檻若飛仙有女學士袁大捨獻春樂詞以諷之複道注見秦始皇二十六年

東宮注見梁武帝中大通元年

**書法**

閣未有書者此其書何非常也於是各高數十丈連延數十間皆以沉檀



為之故書終綱目  
書起閣一而已

**發明**

亡國之事非一而奢侈淫泆為多江  
左自蕭梁之敗境土日蹙大非晉宋

之比今陳氏以蕞爾一隅之地外當強敵  
兢兢自保猶懼弗免而况叔寶以淫侈趣  
之哉書陳起臨春結綺望仙閣觀其名而  
考其實則奢慾亡國之事具矣能無入井  
之及乎

乙 陳至德三年  
己 隋開皇五年

春正月朔日食○隋頒五禮

禮部尚書牛

弘所修也

**質實**

五禮注見梁武帝天監十一年

夏五月隋初置義倉親閱戶口作輸籍法

度支尚書長孫平奏令民間每秋家出粟麥  
一石以下貧富為差儲之當社委社司檢校  
以備凶年名曰義倉隋主從之胡氏曰賑饑  
莫要乎近其人隋義倉取之於民不厚而置  
倉于當社饑民之得食也其庶矣乎後世義  
倉之名固在而置倉于州郡一有凶饑無狀  
有司固不以上聞也良有司敢以聞矣比及  
報可委吏屬出而施之文移反復給散艱阻  
監臨胥吏相與侵沒其受惠者大抵城郭之  
近力能自達之人耳居之遠者安能扶老携  
幼數百里以就龠合之廩哉必欲有備無患  
當以隋氏為法而擇長民之官行劭農之法



輔以抹荒之政本末具舉民之饑也庶有廖  
乎○時民間多妄稱老小以免賦役隋主命  
州縣大索貌閱戶口不實者里正黨長遠配  
大功以下皆令析籍以防容隱於是計帳得  
新附一百六十四萬餘口高頴又言民間課  
輸無定簿難以推校請為輸籍法隋主從之  
自是姦無所容矣

**集覽**

無狀狀牒也又陳也謂無陳  
訴凶饑之文狀龠合之廩龠

合並量名也龠容千二百黍兩龠為合十合  
為升古者給人以食取之於倉廩故因稱廩  
給廩倉劭農漢成帝詔先帝劭農蘇林注劭  
音翹晉灼曰時召反勸勉也顏師古曰晉說  
是貌閱東漢江革傳每歲時縣當案比注云  
案驗以比之猶今言貌閱也遠配配流刑隸

也容隱不實者

**正誤**

一有凶饑無狀有司固  
不以上聞也良有司敢

配流於遠地

以聞矣云云今按無狀當連有司為句謂無  
狀之有司也有司不良之尤甚者不可形容  
指言故曰無狀下

**覽**

長孫平洛陽人大功  
注見漢桓帝熹平五

年

**書法**

書置義倉予良法也故書初綱目書  
義倉一而已○此後世義倉之始

# 梁主歸殂太子琮立

巋孝慈儉約

境內安之



# 秋八月突厥可汗遣子入朝于隋

突厥阿波可汗寢強諸胡皆附號西突厥沙鉢略既為達頭所困又畏契丹遣使告急於隋請將部落度漠南隋主命晉王廣以兵援之給以衣食賜之車服鼓吹沙鉢略因擊西突厥破之而阿拔國乘虛掠其妻子官軍為擊阿拔敗之沙鉢略大喜乃立約以磧為界因上表曰天無二日土無二王大隋皇帝真皇帝也豈敢阻兵恃險偷竊名號今屈膝稽顙永為藩附遣其子庫合真入朝自是歲時貢獻不絕

**集覽** 漠南注見漢獻帝建

**質實** 契丹北狄國名注見晉安

帝義熙二年鼓吹注見晉武帝太康三年

## 陳主殺其中書通事舍人傅縡

縡負才使氣人多怨之施文慶沈客卿共譖縡受高麗使金陳主收縡下獄縡於獄中上書曰夫君人者恭事上帝子愛下民省嗜欲遠諂佞未明求衣日盱忘食是以澤被區宇慶流子孫陛下頃來酒色過度不虔郊廟大神專媚淫昏之鬼小人在側宦豎弄權惡忠直若仇讎視生民如草芥後宮曳綺繡廐馬餘菽粟百姓流離僵屍蔽野貨賄公行帑藏損耗神怒民怨眾叛親離臣恐東南王氣自斯而盡矣書奏陳主大怒頃之意稍解遣使



謂曰我欲赦卿卿能改過不對曰臣心如面  
面可改則心可改矣陳主益怒遂賜死陳主  
每當郊祀常稱疾不行故緯言及之

**集覽**

緯音再

**質實**

傳緯靈州人高

麗外夷國名注見  
漢武帝元封二年

**書法**

斥書主何惡淫虐也綱目於刑殺必  
斥書主者五君焉宋子業齊寶卷北

齊高洋高緯陳叔寶皆淫虐之  
主也舍是刑殺無專斥主者矣

**發明**

殺諫臣者必亾國傳緯負才使氣雖  
失之激然其所言則皆陳主之實既

不能從反欲使緯改過而赦之夫過在陳  
主所當改也彼又何過之有故特書陳主

殺其中書通事舍人以惡之  
下書殺大市令章華亦然

### 隋復置江陵總管

梁大將軍戚昕以舟師襲公安不克而還隋  
主徵梁主叔父吳王岑入朝拜大將軍因留  
不遣復置江陵

**質實**

公安縣名注見漢獻帝  
建安十九年江陵郡名

注同上  
十三年

### 隋築長城

隋主發丁三萬於朔方靈武築長城東距河  
西至綏州綿歷七百里四年又發十五萬緣



邊築數十城

**質實**

朔方郡名注見漢武帝元朝元年靈武郡名注見唐

以遏胡寇  
玄宗天寶十五載河西郡名注見漢安帝元初元年綏州注見秦王政三年上郡

丙陳至德四年隋開皇六年  
午○梁後主琮廣運元年

春正月党項羌請

降于隋

**集覽**

党項羌西羌別種其國在禹貢析支之地東至松州西接葉護南界

春桑北鄰吐渾有地三千餘里

○隋頒曆于突厥

**書法**

頒曆外夷始此

二月隋制刺史上佐每歲入朝考課○秋閏

八月隋殺其上柱國梁士彥宇文忻劉昉

初士彥討尉遲迥破之代為相州刺史忻與隋主少相厚善用兵有威名隋主皆忌之以譴去官昉亦被疎遠俱懷怨望忻欲使士彥於蒲州起兵已為內應士彥之甥裴通預其謀而告之隋主隱其事以士彥為晉州刺史欲觀其意士彥欣然謂昉等曰天也隋主因其朝謁執而詰之遂皆伏誅隋主素服臨射殿命百官射三家資物以為戒

**質實**

相州注見漢元帝建昭二年魏郡蒲州注見周赧王十二年蒲坂晉州注見漢獻帝建安七年河東三家謂梁士彥宇文忻劉昉之家



**書法**

三人怨望有異心則罪也曷為不書誅咎隋主也佐命功臣而以善兵加忌或免之或踈之則隋主亦少負矣故於是特書殺

**發明**

梁士彥輩反狀明白何不書其謀反伏誅隋主篡竊昉實賣國與之至於士彥身為總管將大兵以擊尉遲迥忻設詭謀以射觀戰之人遂能破迥以成篡事若三人者可謂篡國之忠臣佐命之元功矣時移事改浸被踈斥素懷傾險之志遂起非望之謀在他人誅之則死有餘罪若隋主則未免有負於中况又出於忌克之心者乎此綱目所以書殺而不去其官者不予隋主之誅也其旨嚴矣

**冬十月隋以楊尚希為禮部尚書**

隋主每旦臨朝日昃不倦尚希諫曰周文王以憂勤損壽武王以安樂延年願陛下舉大綱責成宰輔繁碎之務非人主所宜親也隋主善之而不能從  
**集覽** 周文王以憂勤損壽武王以安樂延年注見魏恭帝元年

**隋以秦王俊為山南行臺尚書令陳以江總**

**為尚書令吐谷渾太子誦請降于隋隋主弗**

納



吐谷渾可汗夸呂在位百年屢因喜怒廢殺太子後太子懼謀執夸呂而降請兵於隋邊吏請以兵應之隋主不許太子謀洩被殺復立其少子嵬王訶復懼誅謀帥部落萬五千戶降隋遣使請兵隋主曰渾賊屈俗特異人倫父既不慈子復不孝朕以德訓人何有成其惡逆乎乃謂使者曰父有過失子當諫諍豈可潛謀非法受不孝之名溥天之下皆朕臣妾各為善事即稱朕心嵬王既欲歸朕朕惟教嵬王為臣子之法不可遠遣兵馬助為惡事嵬王訶訶少子之名

訶乃止

**集覽**

嵬王訶訶少子之名封為嵬王嵬五灰反

**發明**

隋主以詐得國獨於叛人不納此一節為得體觀其告諭吐谷渾之語可

謂義理明白詞旨忠厚真帝王之盛節使隋主每事若此庸可非哉書以予之宜矣

丁陳禎明元年隋開皇七年春正月隋制諸州歲未年是歲梁亡凡二國

貢士三人○二月隋開陽州山湯瀆**質實**揚州注見

漢武帝元朔五年淮南山陽縣名注見晉帝奕太和四年○突厥沙鉢略可

汗死第莫何可汗處羅侯立

初沙鉢略以其子雍虞閭懦弱遺令立其弟葉護處羅侯沙鉢略死雍虞閭遣使迎之處羅侯曰自木杆以來多以弟代兄以庶奪嫡失先祖之法不相敬畏汝當嗣位我不憚拜



汝雍虞間曰叔與我父共根連體豈可反屈於卑幼乎且亾父之命何可廢也願叔勿疑遣使相讓者五六處羅侯竟立是為莫何可汗以雍虞間為葉護莫何勇而有謀以隋所賜旗鼓西擊阿波阿波之衆以為隋兵助之多望風降附遂生擒阿波上書請其死生之命隋主以問長孫晟晟對曰若突厥背誕須齊之以刑今其昆弟自相夷滅阿波之惡非負國家因其困窮取而為戮恐非招遠之道不如兩存之高頰亦曰骨肉相殘教之蠹也宜存養以示寬

**集覽**

葉護突厥大臣之官也葉失涉反木杆前可汗

州犁曰子姑憂子哲之欲背誕也杜預注背命放誕也

**實實**

可汗注見漢後主景

耀四年

### 夏五月朔日食

**書法**

陳自得國至亾三十三年由巳卯及今二十九年而書日食二十六巳卯

年辛巳年二壬午年癸未年甲申年二乙酉年丙戌年丁亥年二戊子年庚寅年辛卯年壬辰年二甲午年乙未年二丙申年丁酉年庚子年癸卯年甲辰年乙巳年是年天戒至矣自古日食之數未有甚於此時者也



○秋九月隋滅梁以其主蕭琮為書公 **考異** 據

大建九年周書封高緯為溫公則此條以當作封 **考證** 以當作廢

隋徵梁主入朝梁主帥其群臣二百餘人發江陵隋主遣武卿公崔弘度將兵戍江陵梁

主叔父安平王巖弟琳等恐弘度襲之遣使請降于陳九月陳荊州刺史陳慧紀引兵至

江陵巖等驅文武男女一萬口奔陳隋主聞之廢梁國遣高頴安集遺民拜梁主琮柱國

賜爵 **集覽** 琳胡質實 武鄉縣名注見晉元帝

見漢後主景耀三年荊州注見漢獻帝建安十三年南郡莒縣名注見漢獻帝建安二年

**書法** 於是蕭巖蕭琳驅萬口奔陳隋主聞之遂廢梁國不書書滅梁何誅意也

嘗罷江陵總管矣戚昕小犯亦豈不可訓責而復置焉既而徵其主入朝又使崔弘

慶將兵戍之隋主之意可知矣雖微巖琳之舉其能免乎直書滅梁隋志也

冬十一月隋主如馮翊祠故社 **質實** 馮翊郡名注見唐玄

宗開元十一年

是行也李德林以疾不從敕書追之與議伐陳之計及還隋主馬上舉鞭南指曰待平陳

之日以七寶裝巖公使自山以東無及公者



# 陳臨平湖開

初隋主與陳鄰好甚篤每獲陳諜皆給衣馬禮遣之而陳侵掠如故故隋伐之會高宗殂隋主卽命班師遣使赴弔書稱姓名頓首陳主荅書末云想彼統內如宜此宇宙清泰隋王不悅以示朝臣上柱國楊素以爲主辱臣死再拜請罪隋主問取陳之策於高顛對曰江北田收差晚江南水田早熟量彼收穫之際微微士馬聲言掩襲彼必屯兵守禦廢其農時彼旣聚兵我便解甲再三如此彼以爲常後更集兵彼必不信猶豫之頃我乃濟師登陸而戰兵氣益倍江南土薄舍多茅竹儲積皆非地窖當密遣人因風縱火待彼脩立

復更燒之不出數年財力俱盡矣隋主用其策陳人始困於是信州總管楊素吳州總管賀若弼及光州刺史高勣等爭獻平江南之策虢州刺史崔仲方上書曰今唯須武昌以下更帖精兵密營度計益信襄荆基郢等州速造舟楫多張形勢若賊以精兵赴援上流則下流諸將卽可擇便橫度如其擁衆自衛則上江水軍鼓行以前彼雖恃九江五湖之險非德無以爲固徒有三吳百越之兵無恩不能自立矣隋主以仲方爲基州刺史及陳受蕭巖等降隋主益忿謂高顛曰我爲民父母豈可限一衣帶水不拯之乎命大作戰船人請密之隋主曰吾將顯行天誅何密之有使投其梯於江曰若彼懼而能改吾復何求



揚素在永安造五牙大艦起樓五層高百餘尺置六柏竿高五十尺容戰士八百人其次黃龍平乘舳艫大小有差晉州刺史皇甫績言陳有三可滅大吞小一也以有道伐無道二也納叛臣蕭巖於我有詞三也陛下若命將出師臣願展綵髮之效隋主勞而遣之時江南妖異特眾臨平湖草久塞忽然自開陳主惡之乃自賣於佛寺為奴以厭之

**集**

**覽**臨平湖開注見晉安帝元興二年陳諜陳軍中之謀也諜今之細作拯之集韻曰舊說拯無切語音丞之上聲引易拊馬壯吉陸德明釋云拯救之拯馬融曰舉也伏曼容云濟也王肅云拔也 **質**班師書太禹謨篇班師振旅註班還振整

也謂整旅以歸也或謂出曰班師入曰振旅

謂班師於有苗之國而振旅於京師也宇宙

注見梁簡文帝大寶元年猶豫注見秦孝文

王元年信州注見漢獻帝建安十九年巴東

吳州注見漢武帝元朔五年淮南光州注見

晉武帝太始二年代陽號州注見宋文帝元

嘉十二年華武昌縣名注見漢後主建興七

年益信襄荆基郢六州名益注見晉武帝太

始八年襄注見漢獻帝建安十二年基注見

漢光武建武九年郢注見漢後主建興七年

九江潯陽記云九江皆在荊州謂烏江蟬江

烏白江嘉靡江畎江源江廩江提江茵江蔡

九峯以為九江者洞庭之別名今沅水漸水

尾水辰水叙水酉水澧水資水湘水皆合於



洞庭意以是名九江也一云浙江揚江松江吳江楚江湘江荆江漢江南江未知孰是姑錄以備考焉五湖謂太湖射陽湖洞庭湖丹陽湖宮亭湖按張勃吳錄曰五湖者太湖之別名以其周行五百里三萬六千頃故以五湖名之此說良是三吳注見晉安帝元興元年百越注見周安王十五年永安縣名注見漢昭烈章武二年黃龍滕王閣序舸艦迷津青雀黃龍之軸註青雀黃龍乃大舡之別名天子所駕御者也

**書法**


書湖開何記異也故吳臨平湖開而

脩省自賣為奴則何益哉

**發明**

孫皓丙申之歲臨平湖開綱目特書于册至庚子歲而吳亡今陳以丁未

之歲臨湖又開至巳酉歲而陳滅然則二國之亡乃天數當然非皓叔寶之罪也嗚呼曷不反而求之古乎夫桑穀生朝太戊以興飛雉鳴鼎高宗復古古人遇災而懼責躬脩德故能反妖致祥豈以天數已定而遂置人事於不問之域乎向使叔寶因湖開之變痛自警飭擢用人才改紀其政嚴職邊備慄慄危懼若禍至之無日則亦未至遽爾滅亡夫何淫恣不已乃自賣於佛寺以厭之天道果可以文欺哉綱目書此正所以著其不知恐懼之意耳不然自湖開之後陳主見之修省者果何如邪詩





曰畏天之威于時保之自古豈有不可回之天意哉

### 陳主殺其大市令章華

吳興章華好學能文以無閔閱除大市令鬱鬱不得志上書極諫畧曰陛下不思先帝之艱難不知天命之可畏溺於嬖寵惑於酒色祠七廟而不出拜三妃而臨軒老臣宿將棄之草莽諂佞讒邪升之朝廷今疆場日蹙隋軍壓境陛下如不改絃易張臣見麋鹿復遊於姑蘇矣陳主大怒斬之胡氏曰人臣之義固不可視君垂亾而不諫然有可否之義焉章華忠矣然位非公卿官非諫爭危言廟上以蹈斧鉞而其本心乃以見擯於時鬱鬱不得志而發也則雖死於直

**集覽**

閔閱注見漢武帝征和四年

言又安得繼洩治之後乎

年廟上湯子廟虎牙注廟音磨杜南詩氣廟

屈賈壘注廟莫婆反削也前漢賈山傳自下

廟上注廟音靡洩治春秋陳靈公通其大夫御叔妻夏姬洩治諫而被殺洩息列反事在

宣九 **正誤** 危言廟上今按廟當音磨厲也孟

焦諫秦始皇雖辯 **質實** 吳興郡名注見宋明

劇虎牙矣亦音磨 帝太始二年七廟注

見楚義帝元年疆場注見漢靈帝建寧二年麋鹿復游於姑蘇左傳哀元年吳王夫差伐越越王句踐使大夫種行於吳吳將許之伍



教訓二十年之外吾恐麋鹿復遊於姑蘇矣  
一統志云姑蘇臺名在蘇州府城西四十里  
姑蘇山上吳王闔閭就山起臺三年聚財  
五年乃成高見三百里下有百花洲在焉

戊申 陳禎明二年 春三月隋下詔伐陳

詔曰陳叔寶據手掌之地恣溪壑之險劫奪  
閭閻驅迫內外窮奢極侈俾晝作夜斬直言  
之客滅無罪之家欺天造惡祭鬼求恩君子  
潛逃小人得志天災地孽物怪人妖背德違  
言搖蕩疆場可出師授律應機誅殄在斯一  
舉永清吳越又送璽書暴陳主二十惡寫詔  
三十萬紙

遍諭江外

**質實**

閭閻注見唐昭宗天復二年  
吳越二國名吳注見漢獻帝

建興三年越注見  
漢和帝永元元年

**書法**

高頴督諸軍書侵辛丑年  
此書伐何叔寶無道也

夏五月陳主廢其太子胤立子深為太子

胤性聰明好文學然頗有過失詹事袁憲切  
諫不聽時沈后無寵陳主疑其母子怨望惡  
之張孔二妃日夜構成其短孔範之徒又於  
外助之陳主欲立張貴妃子始安王深為嗣  
尚書蔡徵順旨稱贊袁憲厲色折之陳主卒  
廢胤為吳興王而立深為太子深亦聰慧有  
志操容止儼然雖左右近侍未嘗見其喜愠  
陳主聞袁憲嘗諫胤即日用憲為僕射陳主



遇沈后素薄張貴妃專後宮之政后澹然未嘗有所忌怨身居儉約衣服無錦繡之飾唯尋閱圖史及釋典為事數上書諫爭陳

**質實**

主欲廢之而立張貴妃會國亾不果  
 詹事官名注見唐高祖武德七年始  
 安郡名注見秦始皇三十三年桂林

**冬十月隋以晉王廣為淮南行省尚書令行軍**

**元帥帥師伐陳**

隋置淮南行省於壽春以晉王廣為尚書令陳主遣王琬許善心聘于隋隋人留之遂有事於太廟命晉王廣秦王俊清河公楊素皆為行軍元帥廣出六合俊出襄陽素出永安

廬州總管韓擒虎出廬州吳州總管賀若弼出廣陵凡總管九十兵五十一萬八千皆受晉王節度旌旗舟楫亘數千里以高熲為元帥長史王韶為司馬軍事皆取決焉熲謂鄆中薛道衡曰江東可克乎道衡曰克之郭璞言江東分王三百年復與中國合今此數將周一也主上恭儉勤勞叔寶荒淫驕侈二也國之安危在所寄任彼以江總為相唯事詩酒拔小人施文慶委以政事蕭摩訶任蠻姦為大將皆一夫之用耳三也我有道而大彼無德而小量其甲士不過千萬西自巫峽十東至滄海分之則勢懸而力弱聚之則守此而失彼四也席卷之勢事在不疑秦王俊督諸軍屯漢口為上流節度陳以周羅暎督諸



軍拒之。楊素引舟師下三峽，軍至流頭灘，陳將軍戚昕以青龍百餘艘，兵數千人，守狼尾灘。地勢險峭，隋人患之。素曰：勝負大計在此一舉。若晝日下船，彼見我虛實，灘流迅激，制不由人，則吾失其便。不如以夜掩之。乃夜帥黃龍數千艘，銜枚而下。遣將軍劉仁恩帥甲騎擊，昕敗之。悉俘其衆，勞而遣之。秋，毫不犯。遂帥水軍東下，舟艦被江，旌甲曜日。陳之鎮戍相繼以聞。施文慶、沈客卿並抑而不言。陳江中無一鬪船。上流兵皆阻楊素軍不得至。湘州刺史晉熙王叔文在職既久，大得人和。陳主忌之，自度素與群臣少恩，恐不爲用，乃以施文慶代叔文。配以精兵二千，欲令西上。文慶深以爲喜，然懼出外之後，執事者待已

短長，因進沈客卿自代。未發間，二人共掌機核，密護軍將軍樊毅言於素。憲曰：京口采石俱是要地，各須銳兵五千，并出金翅二百，緣江上下，以爲防備。憲及驃騎將軍蕭摩訶皆以爲然。施文慶恐無兵從已，而客卿又利文慶之任，已得專權。白陳主曰：此是常事。邊城將帥足以當之。若出人船，必恐驚擾。及隋軍臨江，間諜驟至。憲等奏請再三。文慶曰：元會將逼南郊，復邇今若出兵，事便廢闕。復以貨動江總使、抑憲等。由是議久不決。陳主從容謂侍臣曰：王氣在此，齊兵三來，周師再來，無不摧敗。彼何爲者？邪？孔範曰：長江天堑，限隔南北。今日虜軍豈能飛度？邪？邊將欲作功勞，妄言事急。臣每患官卑虜若度江，定作太尉公。



矣陳主以為然故不為深備奏伎縱酒賦詩不輟

金翅戰 **質實** 壽春縣名注見秦王政六年許善心高陽北新人清河縣名注

船名 見漢安帝建光元年六合縣名注見陳宣帝

太建五年襄陽縣名注見宋明帝泰始元年

廬州注見漢景帝五年廬江廣陵縣名注見

梁武帝太清二年一統志云郭璞聞喜人博學高才工詞賦時有郭公者精卜筮璞從之

游得青囊中書由是洞知五行卜筮之術占驗甚多撰洞林新林卜韻爾雅註數十篇又註三蒼方言山海經楚辭詩賦數十萬言避地過江晉元帝重之以為著作佐郎巫峽注見漢昭烈章武二年漢口漢水之口注見漢

獻帝建安十二年周羅喉尋陽人三峽注見宋明帝太始二年流頭灘未詳處所唯荊州

府夷陵州三峽中有虎頭鹿角狼尾三灘最為艱險或疑流頭灘即虎頭灘未知是否智者察焉青龍大船之別號銜枚注見秦二世

二年湘州注見漢獻帝興平元年長沙晉熙郡名注見梁簡文帝大寶元年京口郡名注見晉成帝咸和三年采石山名注見宋文帝

元嘉二十七年從容注見漢後主延熙元年

**突厥莫何可汗死兄子頡伽施多那都藍可汗**

**立吐谷渾禪王末彌降隋**



吐谷渾裨王拓跋木彌請以千餘家降隋隋主曰渾賊悖狂妻子懷怖然叛夫背父不可收納又其本意正自避死今若違拒又復不仁但宜慰撫任其自拔不須出兵應接

**集**

**覽** 裨王拓跋木彌裨音皮偏也拓跋虜復姓也木彌其名

隋高祖文皇帝開皇九年春正月總管賀若

**弼** 韓擒虎進軍滅陳獲其主叔寶

正月朔陳主會朝大霧四塞陳主昏睡至晡時乃寤是日賀若弼自廣陵引兵濟江先是弼以老馬多買陳船而匿之買弊船五六十艘置於瀆內陳人覘之以為中國無船又令

緣江防人交代之際必集廣陵大列旗幟幕被野陳人以為隋兵大至急發兵為備既而知之不復設備又緣江時獵人馬誼譟及是濟江陳人遂不知覺韓擒虎將五百人自橫江宵濟采石守者皆醉遂克之戍主馳啓告變陳主以蕭摩訶樊毅魯廣達並為都督司馬消難施文慶並為大監軍遣樊猛帥舟師出白下既而賀若弼拔京口軍令嚴肅秋毫不犯有軍士於民間酤酒者弼立斬之所俘獲六千餘人弼皆釋之給糧勞遣付以敕書令分道宣諭於是所至風靡韓擒虎進攻姑孰半日拔之父老來謁者晝夜不絕於是弼自北道擒虎自南道並進緣江諸戍望風盡走弼進據鐘山晉王廣遣總管杜彥與韓



擒虎合軍屯于新林陳人大駭降者相繼時  
建康甲士尚十餘萬人陳主唯晝夜啼泣臺  
內處分一以委施文慶文慶既知諸將疾已  
恐其有功乃奏曰此等怏怏那可專信由是  
諸將凡有啓請率皆不行賀若弼之攻京口  
也蕭摩訶請逆戰不許及弼至鐘山摩訶又  
曰弼懸軍深入壘塹未堅出兵掩襲可以必  
克又不許任忠言於陳主曰兵法客貴速戰  
主貴持重今國家足食足兵宜固守臺城緣  
淮立柵北軍雖來勿與交戰分兵斷江路無  
令彼信得通給臣精兵一萬金翅三百艘下  
江徑掩六合彼大軍必謂其度江將士已被  
俘獲自然挫氣淮南士人與臣舊相知悉今  
聞臣往必皆景從臣復揚聲欲往徐州斷彼  
歸路則諸軍不擊自去待春水既漲上江周  
羅暉等衆軍必沿流赴援此良策也陳主不  
能從明日歛然曰兵久不決令人腹煩可呼  
蕭郎一出擊之任忠叩頭苦請勿戰孔範又  
奏請作一決當爲官勒石燕然陳主從之多  
出金帛克賞使魯廣達陳於白土岡任忠樊  
毅孔範蕭摩訶軍以次而北亘二十里首尾  
進退不相知賀若弼登山望之馳下以所部  
甲士八千勒陳待之陳主通於蕭摩訶之妻  
故摩訶無戰意唯魯廣達以其徒力戰與弼  
相當隋師退走數四弼縱煙以自隱陳兵斬  
首皆走獻求賞弼知其驕惰更引兵趣孔範  
範兵暫交卽走諸軍亂潰不可復止擒蕭摩  
訶釋而禮之任忠馳見陳主言敗狀曰官好



住臣無所用力矣。陳主與金兩勝，使募人出戰。忠曰：「陛下當就上流進軍，臣以死奉衛。」陳主信之，救出部分會韓擒虎自新林進軍。忠遂帥數騎迎降於石子岡，引擒虎軍直入朱雀門。陳人欲戰，忠揮之曰：「老夫尚降，諸軍何事？」眾皆散走。唯袁憲在殿中，陳主謂曰：「我從來遇卿，不勝餘人。今但追愧耳。」陳主遑遽，將避匿。憲正色曰：「大事如此，去欲安之？」不若正衣冠，御正殿。依梁武帝見侯景故事，陳主不從。曰：「吾自有計。」乃從宮人十餘出，景榜艘將自投于井。憲苦諫不從。後閤舍人夏侯公韻以身蔽井，陳主與爭久之，乃得入。既而軍人窺井，呼之不應，欲下石，乃聞叫聲，以繩弼之，驚其太重，及出，乃與張貴妃、孔貴嬪同東而

上。沈后居處如常，太子深年十五，閉閣而坐。舍人孔伯魚侍側，軍士叩閤而入，深安坐勞之。軍士咸致敬焉。賀若弼乘勝至樂遊苑，魯廣達猶督餘兵苦戰不息，所殺獲數百人。會日暮，乃解甲面臺再拜慟哭，謂眾曰：「不能救國，負罪深矣。」士卒皆涕泣歎歎，遂就擒。弼燒門入，聞擒虎已得，叔寶呼視之。叔寶惶懼流汗，股慄，向弼再拜。既而弼耻功在擒虎後，與之相詢，挺刃而出，欲令叔寶作降箋歸已，不果。

**集覽** 景從景讀與影同，一決決與訣通要法也。為官勒石燕然，言我當為官家攻逐隋軍如漢和帝時竇憲擊北匈奴，登燕然山刻石勒功而還也。官注見宋明帝泰始元年，燕然注見漢武帝征和三年相詢詢與詬。



通音許候反說文

**正誤**

請作一決今按陳主云兵久不決令人腹

煩可呼蕭郎一出擊之故孔範

**質實**

橫江注見漢獻

帝興平元年魯廣達郿人悉達之弟白下城

名注見宋明帝太始元年姑孰郡名注見晉

明帝太寧元年鍾山注見梁武帝太清二年

杜彥雲中人新林浦名注見宋文帝元嘉三

年建康郡名注見漢獻帝興平二年金陵快

快注見漢光武建武二年臺城注見宋文帝

元嘉三十年淮水名注同上年徐州注見秦

始皇二十八年彭城一統志云白土岡在應

天府東其土色白隋賀若弼屯兵蔣山之白

土岡擒陳將蕭摩訶即此石子岡在應天府

南一十五里吳志建業南有長陵名曰石子

岡景陽殿在應天府上元縣治東北五里臺

城內劉宋元嘉中所建井即景陽井在應天

府上元縣治東北五里臺城內一名胭脂井

**書法**

陳後主與張麗華孔貴嬪投其中以避隋兵

後人名為辱井樂遊苑在應天府北七里覆

舟山南劉宋元嘉中禊飲賦詩於此顏延之為序

之國之君其辭五死之上也執虜次之以歸次之獲次之降為下此其書

獲何非降非執窺井得之則獲而已矣然則曷為先書滅陳無抗者則已滅矣滅不繫其獲也賀若之謀擒虎之勇俱為有功二將並書一先一後綱目有以斷此訟矣



終綱目亾國之君書獲  
三劉懽齊緯陳叔寶

**發明** 晉之平吳綱目書張悌迎戰死之是猶有人拒戰猶有人死敵也隋氏伐

陳自去冬興師距今數月間未聞陳有一人抗禦迎敵觀綱目所書弼擒虎進軍滅陳易於拉朽如入無人之境則陳人坐取滅亾無足恤者夫有國之事莫重於邊報之急而陳人付之不問方且上下相蒙談王氣夸天塹儼然泰山之安兵既入城乃投于井觀叔寶所謂吾自有計者不過如此雖欲不亾奚可得乎自古亾國多矣未有如叔寶之謬者臣故備而論之○金履祥曰孟子言不仁而得天下未之有也孟子以前未有不仁而得天下之事得夷羿寒浞本身即已誅滅孟子以後固多有不仁而得天下者矣不但一再傳失之然子孫誅滅殆無遺類不止於猶不得已孟子之言未嘗不驗也

### 晉王廣入建康誅陳都督施文慶等五人

高頴先入建康晉王廣使人馳告之令留張麗華頴曰昔太公蒙面以斬妲己此豈可留也斬之廣聞之變色曰昔人云無德不報我必有以報高公矣由是恨頴尋入建康以施文慶諂佞沈客卿聚斂與陽慧朗徐哲暨慧景皆為民害斬之以謝三吳使高頴與記室



裴矩收圖籍封府庫一無所取聞者賢之以賀若弼違令先期收以屬吏帝驛召之且詔廣曰平定江表弼與擒虎之力也賜物萬段別詔褒美開府王頒僧辨之子也夜發陳高祖陵焚骨取灰投水而飲之既而自縛歸罪於廣廣以聞而赦之

**集覽**

殷紂

之正妃皇甫謐曰有蘇氏之女美好辯辭嬖倖於紂索隱曰按國語有鍾氏之女妲字已姓也妲音

**質實**

王伐紂紂既斬頭懸于太白

當割反之旗王復令軍士斬紂妃妲已及臨刑一笑百媚軍士釋然太公以帛蒙其面而斬之三吳注見晉安帝元興元年裴矩河東人王頒太原祁縣人一統志云陳高祖陵在應天府

東二十五里也名陵里陵曰萬安地

**書法**

文慶書誅罪之也罪之則曷為具官若曰身為都督而不能一戰云爾至

書孔範等則削其官矣故陳臣惟施文慶書都督惟周羅振書都督

**發明**

施文慶沈客卿未論其他止以隋兵渡江一事觀之二人相與蒙蔽坐致

陳亾其罪固不容於死况又平時迷國誤朝者乎廣能誅之以謝三吳可謂得弔民伐罪之意者宜乎綱目亦書而予之也

以許善心為散騎常侍



帝使以陳亾告許善心善心衰服號哭於西階之下籍草東向坐三日敕書唁焉明日就館拜散騎常侍善心哭盡哀改服垂泣再拜受詔明日乃朝伏泣於殿下悲不能興上顧左右曰我平陳國唯獲此人既

**集覽**

唁焉唁魚戰反

能懷其舊君即我之誠臣也

**質實**

衰服法見晉武帝泰始十年

### 陳水軍都督周羅暉降

初羅暉守江夏秦王俊不得進踰月陳南康內史呂忠肅據巫峽鑿巖綴鐵鎖橫截上流以遏隋船竭其私財以充軍用楊素擊之四十餘戰忠肅守險力爭隋兵死者五千餘人

柏

既而隋師屢捷忠肅棄柵而遁復據荆門之

之於是巴陵以東無復城守者及建康平諸城皆解甲羅暉乃與諸將大臨三日放兵散

然後詣俊降上江皆平王世積在

**集覽**

荆門注見

唐高祖武德三年散然散上聲閑

**正誤**

放兵散字

散也白居易詩閑散讀作平聲

**質實**

江夏郡名注見漢後主建興七

年武昌南康郡名注見梁簡文帝大寶元年

巫峽注見漢昭烈章武二年巴陵郡名注見宋文帝元嘉三年大臨三日臨哭也一統志云蘄口蘄河之口在黃州府蘄州北發源大



浮山西流  
入赤東湖

### 遣使巡撫陳地州郡○二月置鄉正里長

蘇威奏請五百家置鄉正使治民間辭訟李德林以為本廢鄉官判事為其里閭親識剖斷不平今令鄉正治民為害最甚上竟用威議乃以百家為里置里長一人

### 將軍宇文述拔吳東揚州執其刺史蕭巖蕭璠以歸殺之

陳吳州刺史蕭璠能得物情陳亡吳人推璠為主右衛大將軍宇文述坐討之破其柵執

璠東揚州刺史蕭巖以會稽降與璠皆送長安斬之質實吳州注見漢後主建興三年

吳國東揚州注見漢和帝永元元年會稽一統志云會稽古地名本秦山陰縣地漢晉以後因之陳析置會稽縣隋以山陰縣省入

唐復置山陰縣屬越州宋會稽與山陰二縣並治郭下元仍舊本朝因之改屬

紹興府長安縣名注見漢惠帝五年

**書法**蕭巖蕭璠何驅民以奔陳者也於是巖既降隋矣歸而殺之逞忿也然則

吳東揚州曷為不書陳陳既亡也陳既亡則不書陳吳東揚州可矣不可書陳刺史乎隋之殺之逞忿而已怒在巖璠而不在於陳刺史也有天下而讐一夫隋主之度



於是為不弘矣。綱目不書陳使若自殺其刺史者，所以志隋主之褊也。

### 陳湘州刺史陳叔慎起兵長沙敗死

楊素之下荆門也，遣龐暉將兵畧地南至湘州。城中將士刻日請降，刺史岳陽王叔慎年十八，置酒會僚吏，酒酣嘆曰：君臣之義盡於此乎？長史謝基伏而流涕助防，遂與侯正理起曰：主辱臣死，諸君獨非陳國之臣乎？今天下有難，實致命之秋也。縱其無成，猶見臣節。青門之外，有死不能。今日之機，不可猶豫。後應者，斬衆咸許諾。乃刑牲結盟，遣人詐奉降書於龐暉，暉入叔慎伏甲執之，以徇。并其衆皆斬之。叔慎坐于射堂，招合士衆數日之中，得五千人。衡陽太守樊通、武州刺史鄔居業皆舉兵助之。隋刺史薛胄將兵適至，擊之。叔慎遣陳正理、樊通拒戰，兵敗。胄乘勝入城，擒叔慎，居業送秦王，俊斬之。

**集覽**

助防

遂與侯正理、正理為助防之官，封遂與侯青門、三輔黃圖云：長安城東出南頭第一門曰霸城門，民見其門色青，名曰青城門，或曰青門。蓋隋都長安，故正理曰：青門之外，有死不能。青門之外，有死不能。今按邵平為秦

**正誤**

東陵侯，秦破為布衣，種瓜青門外。陳

正理謂陳國既亡，若使我降隋至長安，如邵平居於青門之外，有死而已，不能往也。後魏時，宇文泰殺柔然，可汗於青門外。則知周隋之時，猶名為青門也。

**集實**

一統志云

實



長沙古地名本秦湘縣地為長沙郡治所漢改曰臨湘隋改曰長沙五代漢析置龍喜縣宋罷龍喜置常豐縣開寶中廢常豐入焉元仍舊本朝因之為長沙府治所仍屬焉岳陽郡名注見梁武帝太清二年遂興東漢縣名晉屬廬陵郡隋省入太和縣今龍泉江口今城即其地故城在吉安府萬安縣西北一十五里衡陽郡名注見宋文帝元嘉十六年武州本漢武陵郡臨沅縣東漢為武陵郡治晉因之梁置武州陳屬武陵郡隋初因之後改武陵縣屬朗州大業中改屬武陵郡唐屬朗州宋初屬鼎州後屬常德府元屬常德路本朝因之為常德府治所仍屬焉

**書法**

吳東揚州不書陳陳亾也此其復書何叔慎之心未嘗無陳也陳亾而有復讐之志者叔慎一人而已故綱目於其始拒隋也書起兵其斬之也書死予義也是故韓雖亾矣張良有復讐之志則書韓張良秦始皇二十九年梁雖亾矣王琳有復讐之志則書梁王琳陳武帝永定二年陳雖亾矣叔慎有復讐之志則書陳叔慎是年皆予其義也

**陳馮竟以嶺南降陳地悉平**

嶺南未有所附數郡共奉高涼郡太夫人洗氏為主詔遣柱國韋洗等安撫嶺外陳豫章

通鑑綱目卷三十三 晉文皇帝開皇九年 三十三



太守徐璿據南康拒之洗等不得進晉王廣遣陳叔寶遺夫人書諭以國亾使之歸隋夫人集首領數千人盡日慟哭遣其孫馮覓帥眾迎洗洗擊斬徐璿嶺南皆定表覓為儀同三司册洗氏為宋康郡夫人衡州司馬任瓌勸都督王勇據嶺南求陳氏子孫立以為帝勇不能用以所部來降瓌棄官去於是陳國皆平得州三十郡一百縣四百詔夷建康城邑宮室更以石頭城置蔣州

**集覽**

洗古黃反璿得質實涼

興平二年

夏四月晉王廣班師俘陳叔寶至京師獻于太

廟論功行賞有差

帝坐廣陽門觀引陳叔寶於前使納言宣詔勞之內史令宜詔責以群臣不能相輔乃至滅亾叔寶及其群臣並愧懼伏地屏息不能對既而宥之魯廣達追傷本朝淪覆得疾不療憤慨而卒帝給賜叔寶甚厚叔寶願得一官號帝曰叔寶全無心肝既而以陳氏子弟多恐其在京城為非乃分置邊州給田業使為生歲時賜衣服以安全之進楊素爵為越



公賀若弼宋公弼與韓擒虎爭功於帝前弼曰臣在蔣山死戰破其銳卒擒其驍將震楊威武遂平陳國擒虎曰臣以輕騎五百直取金陵執陳叔寶弼夕方至臣啓關納之安得與臣比帝曰二將俱爲上勲於是進擒虎上柱國高頴爵齊公從容命頴與弼論平陳事頴曰弼先獻十策後苦戰破賊臣文吏耳焉敢與之論功帝大笑嘉其有讓初上嘗使頴問方畧於李德林至是賞其功授柱國封郡公已宣敕或說頴曰今歸功德林諸將必當憤惋而公亦爲虛行矣頴又言之乃止賀若弼撰其所畫策上之謂之御授平陳七策帝弗省曰我不求名公宜自載家傳後突厥來朝帝謂之曰汝聞江南有陳國乎因命左右

引突厥詣韓擒虎前曰此是執得陳國天子者擒虎厲色顧之突厥惶恐不敢仰視龐晃

等短高頴帝怒皆黜之親禮逾密因謂頴曰公猶鏡也每被磨瑩皎然益明

**集覽**

門觀觀去聲廣 **質實** 越州名注見漢和帝永陽門上觀闕 元元年宋州名注見漢

後主延熙十八年蔣山注見梁武帝太清二年鍾山金陵郡名注見漢獻帝興平二年齊

州名注見漢景帝三年濟南從容注見漢後主延熙元年俘注見梁武帝大通元年俘馘

**書法** 書滅國多矣未有書俘者書俘何賤獲者也終綱目滅國書俘二陳叔寶

王世

克等



復故陳境十年餘州一年

**書法** 滅國弔民善政也嘗書魏復益州半租五年矣漢後主炎興元年於是再

見終綱目滅國書復其民二未有厚於此者也

○投陳孔範等於邊裔

晉王廣之戮陳五佞也未知孔範王瑳王儀沈攸之罪故得免至是始暴其惡投之邊裔以謝吳越之人瑳忌刻貪鄙儀傾巧側媚攸險酷邪諂故同罪焉

**集覽** 陳五佞陳景授之邊裔投棄也即詩巷伯篇投畀有北

之義邊遠外之名裔衣裾之末故四陲謂之四裔 **質實** 傾巧側媚注見新莽天鳳

三年

**發明** 五佞既誅而範等漏網今既知其罪矣乃止投於邊裔書之于冊譏失刑也

以陳江總袁憲等為開府儀同三司

以江總袁憲蕭摩訶任忠為開府儀同三司帝嘉袁憲雅操下詔以為江表稱首又以陳散騎常侍袁元支數直言擢拜主爵侍郎謂群臣曰平陳之初我悔不殺任蠻奴受人榮



禄兼當重寄不能橫屍狗國乃匹無所用力  
 與弘演納肝何其遠也見周羅喉慰諭之許  
 以富貴羅喉泣對曰臣荷陳氏厚遇本朝淪  
 亾無節可紀得免於死陛下之賜也何富貴  
 之敢望賀若弼謂羅喉曰聞公郢漢捉兵即  
 知揚州可得羅喉曰若得與公周旋勝負未  
 可知也伐陳之役以陳降將羊翔為鄉導位  
 至上開府儀同三司班在羅喉上韓擒虎戲  
 之曰不知機變乃立羊翔之下羅喉曰昔嘗  
 謂公天下節士今日之言非所望也擒虎有  
 愧色初陳散騎常侍韋鼎聘于周遇帝而異  
 之謂曰公當大貴貴則天下一家歲一周天  
 老夫當委質於公矣及歸盡賣田宅或問其  
 故鼎曰江東王氣盡於此矣至是召為上儀

同三

**集覽**

弘演納肝春秋狄伐衛衛懿公欲  
 發兵兵或畔遂殺懿公盡食其肉

獨舍其肝弘演使而還哭盡哀而止曰臣請  
 為儆乃自出其肝內公之肝焉儆音豹韻會  
 注引唐制新到官府併上者謂之儆增韻注  
 吏官連直也猶今當儆使者歲一周天天宮  
 書注物理論云歲行一次謂  
 之歲星十二歲而星一周天  
**質賞** 郢漢二州  
 漢後主建興七年漢注見漢成帝鴻嘉三年  
 韋鼎杜陵人委質注見周威烈王二十三年  
**書法** 孔江皆狎客也皆亾陳者也一刑一  
 賞謂之何哉綱目比而書之得失見  
 矣



**發明**

江總狎客甚非素憲忠正之比而乃與之並命則非其倫矣據事直書而

義自見

### 詔除毀兵仗

詔曰今率土大同含生之性禁衛之餘鎮守

之外戎旅軍器皆宜停罷武力之子俱可學

經民間甲仗

**質實**

戎旅注見漢武

悉皆除毀

帝元鼎二年

**書法**

秦書銷兵器始皇二十六年譏私也於是復書除毀兵仗秦隋一轍矣是

後又書收天下兵器開皇十五年書禁民間軍器煬帝大業五年至於鐵叉搭鈎之

類皆禁之隋文又甚矣

### 殺樂安公元諧

**質實**

樂安縣名注見漢靈帝中平二年

諧性豪俠有氣調好排詆不能取媚左右與王誼善誼誅或告諧謀反案驗伏誅

**覽**

氣調調去聲氣槩風調也

**書法**

或告諧反不書書殺綱目有以斷斯獄矣

閏月以蘇威為僕射楊素為納言。秋七月群

臣請封禪不許



**書法**

漢世祖末年群臣請封禪不許不書  
光武建武三十年此何以書卒不封  
禪也與六年不許而十一年詔議封  
禪禮者異矣唐太宗貞觀十一年

**發明**

諛佞成風已非一日是歲甫平陳國  
瘡痍未瘳而群臣已請封禪舉朝豈  
無一人正議要亦從風而靡隋文不許此  
亦盛德之事直筆書之所以予其君而貶  
其臣也

○八月以王雄為司空

左衛大將軍王雄貴寵特盛寬容下士朝野  
傾屬帝陰忌之以雄為司空實奪之權雄  
杜門不通賓客

冬十二月詔定雅樂

帝踐祚之初柱國鄭譯請修正雅樂詔太常  
卿牛弘國子祭酒辛彥之博士何妥等議之  
積年不決譯言古樂十二律旋相為宮各用  
七聲世莫能通譯因龜茲人蘇祗婆善琵琶  
始得其法推演為十二均八十四調以校大  
樂所奏例皆乖越又於七音之外更立一聲  
謂之應聲與邳公世子蘇夔議累黍定律時  
人以音律久無通者非譯夔一朝可定帝素  
不悅學而牛弘不精音律何妥自恥不逮常  
欲沮壞其事乃立議非之或欲令各造樂而



北金糸... 卷三... 樂志... 擇其善者安又恐樂成善惡易見乃請張樂  
試之先白帝云黃鍾象人君之德及奏黃鍾  
之調帝曰滔滔和雅與我心會安因奏止用  
黃鍾一宮不假餘律上悅從之時又有樂工  
萬寶常妙達鍾律上召問之寶常曰此亾國  
之音也上不悅寶常請以水尺爲律上從之  
寶常造諸樂器其聲率下譯調二律其聲雅  
淡不爲時人所好蘇夔尤忌之夔父威方用  
事凡言樂者皆附之寶常樂竟寢不行及平  
陳獲宋齊樂器工人上廷奏之歎曰此華夏  
正聲也乃調五音爲五夏二舞登歌房內等  
十四調賓祭用之太常置清商署以掌之至  
是牛弘又奏中國舊音多在江左今得梁陳  
舊樂請加脩緝以備雅樂其後魏後周之樂

與許善心姚察及虞世基參定  
**集覽** 十二律律

書索隱注律有十二陽六爲律黃鍾太簇姑  
洗蕤賓夷則無射陰六爲呂大呂夾鍾仲呂  
林鍾南呂應鍾是也周景王問律於伶州鳩  
對曰律所以立均出度也紀之以三平之以  
六成於十二七聲注見梁武帝天監元年琵琶  
本胡中馬上樂推手前曰琵琶卻手後曰琵琶  
因以爲名十二均均樂器制長七尺繫之以  
絲以均鍾音韋昭曰十二律均布節氣故有  
六律六均五夏二舞登歌群書考索曰隋音  
樂志望帝入出奏皇夏群官入出奏律夏舉  
酒上壽奏需夏迎送鬼神奏昭夏薦獻郊廟  
奏咸夏宴亨殿上奏登歌并文舞武舞合爲

自正... 卷三... 樂志... 三十一



八曲案文舞者執羽籥武舞者執干戚登歌  
 注見宋文帝元嘉二十二年房內考索曰隋  
 文帝龍潛時頗好音樂嘗因倚琵琶作歌二  
 首名曰天高地厚託言夫妻之義因即取之  
 為房內曲命女人教習  
**質實** 雅樂注見齊武  
 並登歌上壽並用之  
**質實** 帝永明九年龜  
 茲西域國名注見漢光武建武二十四年邳  
 州名注見漢高帝六年下邳蘇夔京兆人威  
 之子黃鍾律名注見齊和帝中興二年  
 姚察武康人僧坦之子虞世基會稽人

### 以辛公義為岷州刺史

岷俗畏疫一人病闔家避之病者多死公義  
 命皆與置廳聽事暑月聽廊皆滿公義設榻晝

夜處其間以秩祿具醫藥身自省問病者既  
 愈乃召其親戚諭之曰死生有命豈能相染  
 若能相染吾死久矣皆慙謝而去其後人有  
 病者爭就使君其家親戚固留養之始相慈  
 愛風俗遂變後遷并州刺史下車先至獄中  
 露坐驗問十餘日間決遣咸盡還領新訟事  
 皆立決有須禁者公義即宿廳事終不還閤  
 或諫曰公事有程何自苦公義曰刺史無德  
 不能使民無訟豈可禁人在獄而安寢於家  
 乎罪人聞之咸自欵服後有訟者鄉間父老  
 遽曉之曰此小事何忍勤  
**集覽** 露坐不設幃  
 勞使君訟者多兩讓而止  
**質實** 帳而坐也

**質實** 岷州注見秦始皇三十三年臨洮辛公  
 義狄道人并州注見齊明帝建武三年



**書法**

書公義何嘉良吏也自漢書第五倫廉范之後蜀漢書裴潛張嶷元魏書王慧龍以循良稱者無幾人隋文罷郡為州書公義書劉曠開皇十五年書令狐熙開皇十五年良吏始班班矣

庚戌 十年春二月以李德林為湖州刺史

德林恃才好勝同列疾之由是以佐命元功十年不徙級數與蘇威異議高頴常助威帝多從之常賜德林莊店使自擇之德林請高阿那肱店店人訴本高氏強奪民田所為威因奏德林誣罔自入帝益惡之虞慶則等奉使關東還奏鄉止專理辭訟黨與愛憎公行貨賄帝令廢之德林曰茲事臣本以為不可

然始置即停朝成暮毀非帝王設法之義自今群臣於律令輒欲改張願陛下即以軍法從事不然紛紜不已帝怒大詬曰爾欲以我為王莽邪先是德林稱父為太尉諮議以取贈官黃門侍郎陳茂言德林父實終於校書帝甚銜之至是面數其罪出為湖州刺史遷懷州卒 **集覽** 不徙級謂資那肱北齊丞相 **質實** 湖州注見宋明帝太始二年吳興懷州注見宋姓高名阿那肱 **質實** 順帝昇明元年

以柳莊為饒州刺史

**質實**

饒州注見梁武帝太清元年鄱陽



給事黃門侍郎柳莊有識度博學善辭令明習典故雅達政事帝及高熲蘇威皆重之與陳茂同僚不能降意茂譖而出之

### 殺趙州參軍李君才於殿內

帝性猜忌不悅學既任智以獲大位因以文法自矜明察臨下恒令左右覘視內外有過失則加以重罪又患令史贓汗私使人以錢帛遺之得犯立斬每於殿廷極人揮楚不甚即命斬之高熲柳彧等諫曰朝堂非殺人之所殿廷非決罰之地不納熲等乃盡請朝堂請罪帝不憚乃令殿內去杖後李君才言帝寵高熲過甚帝怒命杖之而殿內無杖遂以

馬鞭捶殺之因復置杖未幾怒甚又於殿廷殺人兵部侍郎馮基固諫不從尋悔宣慰基而怒群臣之不諫者集覽揮楚楚猶筆也正誤揮楚不甚猶杖也通鑑本文云嘗怒問事揮楚不甚即命斬之胡三省註問事者行杖之人以揮楚不甚重質實楚州注見晉武帝而斬之也大明三年山陽

#### 書法

殺未有書地者書殿內何譏非地也隋主暴急殺人殿廷屢矣不悉書書

殿內舉重也

#### 發明

周官司刺掌三刺之法自群臣群吏至於萬民皆訊之加以三宥三赦而



後致辟其不輕於行法如此况刑人於市與衆棄之烏有一怒之頃遂殺人於殿廷之間哉隋文以察爲明任情殺戮雖有高頴馮基之徒固諫力爭亦復不從綱目書殺參軍李君才於殿內則君才無可誅之罪殿內非刑人之所其惡皆不言自見矣

### 夏五月詔軍人悉屬州縣

詔曰魏末喪亂軍人權置坊府南征北伐居處無定今可悉屬州縣其墾田籍帳一與民同軍府統領宜依舊式仍罷緣邊新置軍府

六月制民年五十免役收庸。秋七月以楊素

爲內史令。冬十一月江南亂以楊素爲行軍

### 總管討平之

江表自東晉以來刑法疏緩世族陵駕寒門平陳之後盡反其政蘇威復作五教使民誦之士民嗟怨民間復訛言隋欲徙之入關遠近驚駭於是越州高智慧蘇州沈玄愴皆舉兵反自稱天子攻陷州縣陳之故境大抵皆反大者有衆數萬小者數千執縣令殺之曰更能使儂誦五教邪詔遣楊素討之素將濟江使麥鐵杖戴束藁夜浮渡江覘賊還而復往爲賊所擒遣兵三十人防之鐵杖取賊刀亂斬防者盡殺之而歸素大奇之奏授儀同



三司素帥舟師自楊子津入擊賊玄憎敗走  
追擒之智慧據浙江東岸爲營周亘百餘里  
船艦被江素擊之子總管來護兒曰吳人輕  
銳利在舟楫必死之賊難與爭鋒公宜嚴陳  
以待之勿與接刃請假奇兵數千潛度掩破  
其壁使退無所歸進不得戰此韓信破趙之  
策也素從之護兒以輕舸數百直登江岸襲  
破其營因縱火煙焰張天素縱兵奮擊大破  
之智慧逃入海素遣總管史萬歲帥衆二千  
踰嶺越海攻破溪洞不可勝數前後千百餘  
戰轉鬪千餘里寂無聲問者十旬遠近皆謂  
已沒萬歲置書竹筒中浮之於水得者以告  
素上其事上嗟嘆厚賜其家素追智慧克溫  
州智慧走保閩越上以素久於外令馳傳入

朝素以餘賊未殄復請行泛海奄至泉州賊  
帥王國慶自以海路艱阻不設備棄州走餘  
黨皆散素分兵追捕密令人說國慶使斬送  
智慧以自贖餘黨悉降江南大定素用兵多  
權畧馭衆嚴整每將臨敵必求人過失而斬  
之多至百餘人流血盈前言笑自若及其對  
陳先令一二百人赴敵或不能陷陳而還者  
悉斬之更令二三百人復進還亦如之將士  
股慄有必死之心由是戰無不勝稱爲名將  
素時貴幸言無不從從素行者微功必錄至  
他將雖有大功多爲文吏所譴却故素雖殘  
忍士亦以此願從焉胡氏曰伐讐討逆誅暴  
解紛兵之大用也讐未復逆未降暴未誅紛  
未解則有不得已而殺人者殺敵而已未聞



先殺吾人而使之致力於殺人也特三令五  
申以警懼之而已楊素部曲皆練習精銳而  
所當者又非強敵乃殘忍如此

**集覽**

玄憎憎  
烏外反

儂音農吳語謂我曰儂子總管總管官名正  
義曰子者人之嘉稱子總管舉其官而稱子  
然閩越注見

**正誤**

子總管今按子總管猶言  
漢惠帝三年小總管裨將也見後四十

三卷子

**質實**

越州注見漢和帝永元元年會  
稽蘇州注見漢獻帝建興三年

麥鐵杖保昌人楊子津未詳處所唯揚州府  
儀真縣南有楊子江經通泰二州入于海昔  
魏文帝嘗至廣陵觀兵臨江見波濤洶湧曰  
嗟乎固天所以限南北也江心水謂之南泠

水陸羽能辨之或疑卽此浙江注見秦始皇  
三十七年來護見江都人此韓信破趙之策  
事在漢王邦三年温州注見漢惠帝三年東  
甌泉州注見漢武帝建元三年部曲注見陳  
文帝天  
嘉元年

番禺夷反遣給事郎裴矩討平之以馮盎為高

州刺史洗氏為譙國夫人

**考異**


討當  
作擊

番禺夷王仲宣反嶺南首領多應之引兵圍  
廣州韋洸中流矢卒詔以其副慕容三藏檢  
校軍事又詔裴矩巡撫嶺南矩至南康得兵  
數千人擊斬仲宣遣別將至南海高涼洗夫



人遣其孫馮暄將兵救廣州。逗遛不進。夫人大怒，遣使執暄繫獄，更遣孫盎會三藏等合擊仲宣。仲宣眾潰，洗氏親被甲乘介馬，張錦繖，引毅騎衛從。裴矩巡撫二十餘州，蒼梧首領陳坦等皆來謁。見矩承制署為刺史，縣令使還，統其部落嶺表，遂定。上以矩為民部侍郎，拜盎高州刺史，贈馮寶譙國公，册洗氏為譙國夫人。開幕府，置官屬，給印章，聽便宜行事。赦暄逗遛之罪。番禺州總管趙訥貪虐，俚獠亾叛，夫人上封事論之。上遣推納竟致於法。救夫人招慰亾叛夫人親載詔書稱使者歷十餘州所至皆降。上嘉之，賜臨振縣為湯沐邑。**集覽** 番禺注見漢高帝十一年介馬介甲也。毅騎毅居候反引滿善射者索隱

曰毅騎張弓之騎也。俚獠俚音里南夷種名也。獠魯皓反又音瓜西南夷謂之獠。湯沐邑注見漢高帝十二年。**質實** 廣州注見秦始皇三十三年。子裴矩聞喜人佗之孫南海郡名注見秦始皇三十三年。馮皇三十三年逗遛注見漢宣帝本始三年。馮盎良德縣人始祖業自北燕浮海奔宋居新會自業至孫融世為羅州刺史融子寶為高涼太守盎寶之孫也。蒼梧郡名注見漢武帝元鼎五年高州注見宋文帝元嘉八年譙國注見漢獻帝建安十五年。番州注見秦始皇三十三年。臨振縣隋初所置屬臨振郡唐省入振州故址在瓊州府城南一百一十里崖州境內。





**書法**

洗氏於是三見綱目矣綱目書婦人封爵十二皆譏也詳漢高后丁巳年

惟洗氏為予辭

辛亥十一年春二月吐谷渾可汗夸呂死子世伏

立

夸呂聞陳亾大懼遁逃保險遣使入貢尋卒

**書法**

吐谷渾書卒久矣復書死何於是天下一統中國有主矣故復書死綱目

內外之辨謹矣哉

### 以刺頭為荅州刺史

平鄉令劉曠有異政以義理曉諭訟者皆引咎而去獄中草滿庭可張羅高頰薦之故有

是命 **質實**

荅州注見漢獻帝建安二年平鄉縣名注見漢靈帝熹平元年虞陶

### 是月晦日食○秋八月殺滕王瓚

初帝微時與瓚不協帝為周相瓚恐為家禍陰欲圖帝其妃周高祖妹順陽公主也亦與獨孤后不平帝命出之瓚不 **質實** 滕縣名注可至是從幸栗園遇鳩暴卒見唐懿宗咸通九年順陽縣名注見晉惠帝永興二年栗園未詳處所鳩注見漢惠帝八年



通鑑綱目卷三十三 隋文帝開皇三年 四十一  
壬十二年秋七月蘇威以開府就第尚書盧愷

### 除名

何妥與蘇威爭議事積不相能威子夔與妥議樂復不同議者以威故同夔者什八九妥志曰吾帝問函丈四十餘年反為昨暮兒所屈邪遂奏威與盧愷薛道衡王弘李同和等共為朋黨帝大怒威免官爵以開府就第盧愷除名知名之士得罪者百餘人自周以來選無清濁及愷攝吏部與薛道衡等甄別士流故涉朋黨之謗以至得罪者幾上曰蘇威德行者但為人所誤耳命復通籍威好立條章每歲責民間五品不遜答者或云管內無

五品之家其不相應領類如此又為餘糧簿欲使有無相贍民部侍郎郎茂以為煩迂不急皆奏罷之茂嘗為衛國令有民張元預兄弟不睦丞尉請加嚴刑茂曰元預兄弟本相憎疾又坐得罪彌益其忿非化民之意也乃徐諭之以義元預等各感悔頓首請罪遂相親睦不相能注見漢武帝元朔五年席間函丈記曲禮曰若非飲食之客則布席席間函丈注謂講問之客也函猶容也講問宜相對容丈足以指畫也飲食之客則布席於牖前又文王世子曰凡侍坐於大司成者遠近間三席可以問注間猶容也容三席則得指畫相分別也席之制廣三尺二寸三分則是所謂函丈也甄別甄吉延反明也察

**集覽**

不相能注見漢武帝元朔五年席間函丈記曲禮曰若非飲食之客則布



也別彼列反鑒別也通籍注見漢宣帝地節二年五品不遜書舜典文蔡氏傳曰五品父子君臣夫婦長幼朋友五者之名位等級也遜順也不相應領謂不答所問

**質實**

盧愷范陽人柔之子一統志云衛國縣名本古之觀國漢為畔觀縣屬東郡東漢更名衛國縣晉屬頓丘郡隋末改觀城縣屬武陽郡唐屬澶州貞觀中省大曆中復置宋省入濮陽尋復置開德府金屬開州元屬濮州本朝因之屬東昌府

是月晦日食○八月制諸州死刑悉移大理奏

裁

帝以天下用律者多踏集覽踏駁孝經序注

**集覽**

駁罪同論異故有是命踏駁孝經序注踏尺尹反駁北

論平聲議法也記王制曰凡制五刑必即天論注論音倫

**書法**

書美恤刑也漢景五年詔獄疑者讞之然非疑者不讞也於是制死罪悉移大理奏裁庶乎不輕殺人者其後復詔三奏然後行刑則益加審矣開皇十六年

冬十月新義公韓擒虎卒

**質實**

新義疑是縣名未詳沿革姑闕

之○十二月以楊素為僕射與高頌專掌朝政



領軍大將軍賀若弼除名

楊素姓陳辨高下在心唯頗推高頗敬牛弘厚接薛道衡視蘇威以下蔑如也其才藝風調優於頗至於推誠體國處物平當有宰相識度則不如頗遠矣賀若弼自謂功名出朝臣之右當為宰相及素為僕射不平形於言色由是免官怨望愈甚久之上下弼獄謂之曰我以高頗楊素為宰相汝每昌言毀之何也弼曰頗是臣之故人素臣之舅子臣知其為人誠有此語公卿奏弼罪當死上曰臣下守法不移公可自來活理弼曰臣將入千兵擒陳叔寶竊以此望活上曰此已格外重賞弼曰臣今還格外望活上低回者數日特令

除名歲餘

**集覽**

低回孔子家世太史公適魯復其爵位

或作祇敬也言祇敬遲回不能去之一作本祇迴義亦通楚辭九歌東君篇心低回兮顧

懷注低

**質實**

昌言釋名云昌盛也顯也

詔免河北河東功調減田租

有司言府藏皆滿無所容積於廊廡於是更闢左藏院以受之上乃詔曰寧積於人無藏府庫河北河東今年田租三分減一兵減半功調全免

遣使均田



時天下戶口歲增京輔及三河地少而人衆衣食不給帝乃發使四出均天下之田其狹鄉每丁纔至十畝集覽三河謂河東河南河北三道也

癸丑 十三年春二月作仁壽宮

詔楊素營仁壽宮於岐州之北素奏宇文愷封德彝為土木監於是夷山堙谷以立宮殿崇臺累榭宛轉相屬役使嚴急丁夫多死覆以土石因而築之死者以萬數質實一統志云仁壽宮在鳳翔府麟遊縣西五里乃隋文帝所建其後唐太宗修以避暑更名九成宮高宗又更名萬年宮後復舊名岐州注見周顯王八年宇文愷朔方人封德彝名

倫觀州 蔣人

禁藏讖緯

質實

讖緯注見齊武帝永明三年

書法

書禁讖緯之學有之矣未書禁藏也此其書禁藏何讖也光武宣布圖讖則讖之禁藏也何讖焉以隋為有留天下之私故讖也終綱書圖讖五而書禁者四目詳漢光武建武中元元年惟隋為讖辭

秋七月晦日食 詔議明堂制度

帝命禮部尚書牛弘等議明堂制度宇文愷獻木樣帝命有司度地立之而諸儒議久不



決乃集覽度地度謀也本作命質實明堂注  
有司矩度安業里地見漢武

帝建元元年

書法書譏何不果立也終綱目書議明堂  
制度二是年唐高宗總章二年皆不


果立者也

### 突厥突利可汗請婚許之

帝之滅陳也以陳叔寶屏風賜突厥大義公  
主公主以其宗國之覆心常不平書屏風為  
詩叙陳亾以自寄帝聞而惡之禮賜漸薄公  
主遂扇惑都藍可汗頗為邊患帝遣將軍長

孫晟使突厥因發公主私事廢之內史侍郎  
裴矩請說都藍使殺公主時處羅侯之子染  
干號突利可汗居北方遣使求婚帝使矩謂  
之曰能殺大義公主乃許婚突利遂譖公主  
於都藍都藍因發怒殺公主更表請婚朝議  
將許之長孫晟曰雍虞閭反覆無信直以與  
玷厥有隙故欲依倚國家雖與為婚終當叛  
去今若尚主承籍威靈玷厥染干必受其徵  
發疆而更反後恐難圖且染干者處羅侯之  
子素有誠款前嘗乞婚不如許之招令南徙  
兵少力弱易以撫馴使敵雍虞閭以為邊  
捍上曰善復遣晟慰諭染干許尚公主

覽 雍虞閭都藍可汗名 質實 尚公主注見晉  
玷厥達頭可汗名 安帝隆安五年






十四年夏四月行新樂

協律郎祖孝孫從陳陽山太守毛爽受京房律法牛弘使孝孫參定雅樂布管飛灰順月皆驗又每律生五音十二律為六十音因而六之為三百六十音分直一歲之日以配七音而旋相為宮之法由是著明弘等乃奏請復用旋宮法帝猶記何妥之言不聽於是弘等復附帝意銷毀前代金石以息異議又作武舞以象功德至是樂成詔行之乃禁民間所造繁聲萬寶常聞新樂泫然泣曰淫厲而哀天下不久盡矣寶常竟餓死且死悉取其書燒之曰集覽京房漢元成時人何妥之言在九年質實協律郎事

物紀原云漢武置律協都尉以李延年始為之晉改為校尉後魏曰協律郎蓋漢武以延年善新聲故特為置協律郎今因之一統志云陽山本秦長沙郡南境之地名漢為桂陽縣屬桂陽郡吳屬始興郡劉宋屬廣興郡齊復屬始興梁分置陽山郡治桂陽隋廢郡置連州大業初改熙平郡唐為連州天寶初改連山郡乾元初復為連州元置連州路隸湖南道大德中降路為州隸英德路本朝初省尋復置隸廣州府京房注見深武帝天監十八年雅樂注見齊武帝永明九年

六月始給公卿以下職田





先是臺省府寺及諸州皆置公廨錢收息取給工部尚書蘇孝慈以為官司出舉興生煩擾百姓敗損風俗請皆禁止給地以營農於是始詔公卿以下皆給職田毋得治生與民爭利

**集覽**

出舉興生出錢以舉人興利而生息漢書食貨志取倍稱之息顏師古曰

稱去聲舉也今

**質實**

蘇孝慈扶風人

秋七月以蘇威為納言

**質實**

納言官名注見漢靈帝光和元年

○詔直太史劉孝孫等定曆已而罷之

初張賓曆既行劉孝孫及劉焯並言其失賓少有寵劉暉附之斥罷孝孫等後賓卒孝孫

復上其事詔直太史累年不調乃抱其書使弟子輿襯詣闕下伏哭執法拘而奏之帝以問何妥妥言其善使與張胄玄校賓曆久之不定上令參問日食事楊素等奏太史奏日食二十有五皆無驗而胄玄所刻妙中孝孫驗亦過半於是上引孝孫胄玄等親勞之孝孫請先斬劉暉乃可定曆

**質實**

劉孝孫彭城人劉焯信都人

輿襯注見漢後主炎與元年張胄玄渤海人

關中旱饑八月帝如洛陽

上道左右視民食得豆屑雜糠以獻上流滄以示群臣深自咎責為之不御酒肉者暮年



至是帥民就食於洛陽敕斥候不得驅迫男女參廁於仗衛之間遇扶老携幼者輒引馬避之至艱險處見負擔者令左右扶助

**集覽** 敕斥候敕誡也斥候注見漢武帝元光元年又注見唐德宗貞元三年

**實** 關中注見唐玄宗開元十一年京兆洛陽縣名注見周顯王三年

### 冬閏十月詔高仁英蕭琮陳叔寶修其宗祀官

### 給器物

詔以齊梁陳宗祀廢絕命高仁英蕭琮陳叔寶以時脩祭所須器物有司給之叔寶待宴

出帝目之曰此敗豈不由酒以作詩之功何如思安時事當賀若弼度京口彼人密啓生急叔寶飲酒遂不之省高類至日見啓在牀下猶未開封誠可笑也  
**集覽** 何如時事何不以作詩功夫  
**質實** 京口郡名注見思量治安當時之事務  
晉成帝咸和三

**書法** 書官給器物何予隋也雖予之也亦傷之也綱目書曰官給則三族之不

能自給可知矣歷叙三族而不及宇文氏非以盡滅其族乎綱目言外之意深矣

**發明** 自南北分裂諸國鼎峙至隋始能一之今隋祖念其宗祀廢絕命高仁英



等以時脩祭亦可少彷彿繼絕之意矣然聖人所謂繼絕世者必以興滅國為先如齊梁陳等國固不可使之復興若封以一邑俾食數十里之賦則不必官給器物自可脩其世祀為悠久計此又隋文之所未及者雖然齊梁陳既祀矣彼宇文氏自介公殞踏之後竟無所聞使隋文能廣作賓王家之意封植其後亦何不可之有夫世祀一也能念齊梁陳而不能念周是何處心不弘如此嗚呼且彼獨不聞牧野之事乎武王克殷反商未及下車而封黃帝之後於薊封帝堯之後於祝封帝舜之後於陶下車而封夏后氏之後於杞殷之後於宋夫武王剪商未幾即與黃帝堯舜夏后氏並封其後今隋主得國於周乃反殄絕其祀何哉然則綱目書詔高仁英蕭瑄陳叔寶脩其宗祀而不及宇文氏其忌克少恩之意又自見於書法之間矣可勝嘆哉

**齊州刺史盧賁有罪除名**

賁坐民饑閉糶除名皇太子為言賁有佐命功不可棄帝曰微劉昉鄭譯盧賁柳裘皇甫績等則我不至此然此等皆反覆子也當周宣帝時以無賴得幸及帝大漸此輩行詐顧命於我我將為政又欲亂之自為難信非我棄之眾人見此謂我薄於功臣斯不然矣賁遂廢卒於家胡氏曰是非之心人皆有之隋文固險黠忮忍而其本心則未嘗泯也方其



圖集大利以權數相傾則攘臂褰裳爭先相  
附者為能及夫所欲既得而反思可否則潔  
身顧義不預危事者為是此蘇威所以蒙殊  
常之顧而譚賁廢死劉昉極刑也亦可為傾  
覆輕薄厭常為集覽大漸顏師古曰漸進也  
新者之深監矣險黠險諛也言行險諛不正也黠下八反桀  
黠也伎忍伎音實狠也一曰慎伎強害也漢  
書酷吏傳周陽由與汲黯俱為伎漢書音義  
曰堅伎也左傳州吁阻兵而安忍注安於殘  
忍也史記楚世家商臣忍質實齊州注見漢  
人也服虔曰言忍為不義南景帝三年濟

### 散騎侍郎王劭上皇隋靈感志

帝好機祥小數劭前後上表言上受命符瑞  
甚衆又探歌謠讖緯摺撫佛書曲加誣飾撰  
皇隋靈感志三十卷奏之上令宣示天下劭  
集諸州朝集使盥手焚香閉目而讀之曲折  
其聲有如歌詠涉旬而集覽機祥史記歷書  
罷帝益喜賞賜優洽機祥廢而不統  
如淳曰呂氏春秋云荆人鬼而越人機今之  
巫祝禱祠淫祀之比也晉灼曰機音珠璣之  
璣顧野王曰機祥吉凶之先見也服虔曰求  
福也探歌謠讖緯探采取之也爾雅謠途歌  
也韓詩曰有章曲曰歌無章曲曰謠讖緯注  
見齊武帝永明三年摺撫注見五代漢隱帝

通鑑綱目卷三十一 齊書卷四十三 五十二



乾祐三年 **質實** 朝集使注見陳宣帝太建十三年

**書法** 世祖宣布圖讖則書讖之於是上令宣示天下則不書何也綱目責備賢

者隋文不學何足深譏獨王劭獻伎無取綱目所甚惡也不書宣示所以專罪劭也

**發明** 去年之春方禁讖緯今乃宣示符瑞於天下是何先後矛盾如此蓋隋之

得國初無功德及民徒以相表奇異而已既得天下欲私之以為已有而猶慮人心

之不服也故前日之禁讖緯正恐天下之人知吾國祚之修短而今日之宣符瑞則

欲使天下之人知已之當為天子有非人力所能致者所為雖殊而所以私天下之

意則一其實皆欲杜絕當時非望之心為吾子孫千萬世不失之計耳君子推見至

隱故於前書其禁讖緯於後書其志靈感然後隋文之心術舉不逃於直筆之間矣

嗚呼隋文之聾瞽斯世者如此孰謂不再傳而遂滅乎

乙卯十五年春正月帝東巡祀天于泰山 **質實** 泰山注見

秦始皇二十八年

以歲旱謝愆咎也禮如南郊

**書法** 未有書祀天者書祀天非郊也歲旱謝咎故特書之



二月收天下兵器

**發明**

秦晉隋平一天下之後或銷兵器或撤武備然皆不再傳而滅漢唐兩朝未嘗行此反乃載祀數百然則慮患貽謀之道殆不在此綱目前書詔除毀兵仗此書收天下兵器亦足以知隋氏之弱其民矣他日蝟盜群起又豈兵器不收之咎乎

三月還宮 ○ 仁壽宮成以封德彝為內史舍

仁壽宮成幸之時天暑役夫死者相次於道楊素悉焚除之帝不悅及至見制度杜麗大

怒曰楊素為吾結怨天下素聞之慮獲譴封德彝曰公勿憂俟皇后至必有恩詔明日帝果召素入對后勞之曰公知吾夫婦老無以自娛盛飾此宮豈非忠孝賜賚厚甚素負貴恃才多所凌侮唯賞重德彝引與論議屢薦於帝擢為內史舍人

**集覽**

幸之蔡邕

**質實**

仁壽官注

見開皇十三年

**書法**

凡上書事下書官官其事也於是楊素薦才不書書官成誅意也素之薦帝之擢以宮成而已矣是故上書仁壽宮成下書以封德彝為內史舍人則知其為



賞宮成之功是年上書廣運潭成下書加  
韋堅左散騎常侍則知其為賞潭成之功

唐玄宗天

寶元年

**發明** 德彞之為小人蓋不待於其晚節而  
於此已見之矣上書仁壽宮成下書

以德彞為內史舍人則此宮雖非德彞所  
造而所以成此宮者德彞也是以書法如  
此故曰德彞之為小人不待  
於其晚節而於此已見之矣

夏六月鑿底柱 **質實** 底柱山名注見漢  
成帝綏和二年 ○焚相

州所貢綾文布於朝堂 **質實** 相州注見漢元帝  
建昭二年魏郡

**書法** 綱目書禁罷貢獻十四詳漢文帝三  
年書獻而却者四莫勇於焚之之舉

矣

○秋七月納言蘇威免尋復其位 **質實** 納言官  
名注見

漢靈帝光和元年  
尋夏煗曰不久也

威坐從祠不敬免俄而復位帝謂群臣曰世  
人言蘇威詐清家累金玉此妄言也然其性  
狠戾不切世要求名大甚從已  
則說違之必怒此其大病耳

冬十月以韋世康為荊州總管



世康和靜謙恕為吏部尚書十餘年時稱廉平常有止足之志謂子弟曰祿豈須多防滿則退年不待暮有疾便辭因懇乞骸骨不許使鎮荊州時天下唯有四總管并揚益荆以晉秦蜀三王質實韋世康杜陵人晉秦蜀三及世康為之質實王謂晉王廣秦王俊蜀王秀

### 十二月敕盜邊糧并以上皆斬

**書法**

書譏峻法也先是法盜一錢以上皆棄市不書過罷也書此則邊糧之法竟行矣隋法之嚴如此及五季唐書詔盜不計賊並行極法漢書制盜賊毋問賊多少皆死尚

何怪哉

**發明**

殺人者死傷人及盜抵罪盜固非一端其間輕重高下隨其所犯則有之矣未聞以并糧而斬人者也周武帝以盜疋帛隱頃地以上皆死君子猶深譏之况又不及此者乎帝王好生之德似不如此綱目大書于册則隋氏之嚴刑酷法殆不減於亾秦矣宜其皆一傳而滅也

○詔文武官以四考受代○賜汴州刺史令孤

熙昂三百匹

**質實**

汴州注見周顯王二十九年大梁



熙考績為天下之最賜帛頒告天下

丙辰十六年夏六月初制工商不得仕進○秋八

月詔死罪三奏然後行刑

**發明** 書詔死罪三奏然後行刑可謂不輕於用法矣然一怒之頃殺人於殿庭

如恐不及則奏亦何待至三觀者自可察矣

○以光化公主妻吐谷渾**質實** 光化縣名注見漢高帝六年鄭

**書法** 自馮跋始女妻柔然者屢矣不書畧之也惟魏以公主嫁突厥小夷則書

之此其書何譏也堂堂中國為天下君而以公主妻非類以具為辱也故自是至唐公主外嫁悉書之

丁巳十七年春二月遣太平公史萬歲討南寧羌

平之 **考異** 討當作擊

初梁睿之克王謙也夷獠皆附唯南寧州酋師爨震不服睿上疏乞因平蜀之眾畧定之帝未之許至是乃以史萬歲為行軍總管帥眾擊之入自蜻蛉川過諸葛亮紀功碑度西洱河入渠濫川行千餘里破其三十餘部虜獲男女二萬餘口諸夷大懼遣使請降獻明



珠徑寸於是勒石頌隋德萬歲請將其首長爨翫入朝翫賂萬歲萬歲捨之

爨華陽國志曰昌寧大姓也南蠻有兩爨一曰東爨烏蠻一曰西爨白蠻西爨之先為晉

南寧郡守因中國亂遂王蠻中故曰南寧西爨西洱河括地志云在南詔國中案大宋重

修廣韻洱音耳 **質實** 太平縣名注見漢光武水出罷谷山 建武六年一統志去南

寧州本漢益州郡地晉置南寧州梁因之唐初析置西寧州貞觀中改黎州唐末為些麼

徒蠻所據號步雄部後屬爨蠻改寧部元初置寧部萬戶後改寧海府至元中改寧州屬

臨安路後以西沙縣省入 本朝因之隸臨安府蜻蛉川未詳處所諸葛亮紀功碑在雲

南府宜良縣南小石嶺唐廣德初鳳伽異築拓東城故有諸葛亮石刻文曰碑即什蠻為

漢奴夷畏誓常以石措梧今廢西洱河在太理府城東即古之葉榆河也一名溺海又名


西洱海源自鄧川合點蒼山之十八川而匯于此形如人耳周三百餘里中有羅笪濃禾

赤崖三島及四洲九曲之勝下流合漾備江濃禾島形如几案故又名玉案山渠濫川在

雲南府昆陽州東南五里東北流入滇池

### 桂州亂遣軍討平之以令狐熙為總管

桂州俚帥李光仕作亂遣周法尚討斬之上以夷越數反以令狐熙為桂州總管許以便





宜從事承制補授熙至部大弘恩信其溪洞  
渠帥更相謂曰前時總管皆以兵威相勝今  
者乃以手教相諭我輩其可違乎於是相帥  
歸附先是州縣生梗長吏多寄治於總管府  
熙悉遣之為建城邑集覽令狐注見唐昭宗  
開學校華夷感化焉正誤州縣生梗今按  
梗梗謂榛梗猶言荆棘生謂不馴熟梗  
也謂州與縣先皆荒蕪謂梗塞不通實實  
猶梗化之梗實實桂州注見秦始皇  
三十二年桂林

### 三月詔諸司論屬官罪聽律外決杖

帝以所在屬官不敬憚其上事難克舉故有  
是詔於是上下相驅迭行捶楚以殘暴為幹

能守法為懦弱又以盜賊繁多命盜一錢以  
上皆棄市或三人共盜一瓜事發即死於是  
行旅皆晏起早宿天下慄慄有數人劫執事  
而謂之曰吾豈求財者邪但為枉人來耳而  
為我奏至尊自古立法未有盜一錢而死也  
而不以聞吾更來而屬無類矣帝聞乃為停  
之又嘗乘怒欲以六月杖殺人大理少卿趙  
綽固爭帝曰六月雖曰生長此時必有雷霆  
我則天而行有何不可遂殺之掌固來曠告  
綽濫免徒囚推驗無實帝怒命斬之綽又固  
爭帝拂衣入閣綽託奏他事復入再拜曰臣  
有死罪三不能制馭掌固使觸天刑一也囚  
不合死不能死爭二也本無他事妄言求入  
三也帝意解會獨孤后在坐命賜綽酒及二



金孟曠因免死蕭摩訶子世界在江南作亂  
摩訶當從坐綽固諫上命綽退綽曰臣奏獄  
未決不敢退帝乃釋之刑部侍郎辛亶嘗衣  
緋禪帝以爲厭蠱斬之綽曰法不當死臣不  
敢奉詔帝怒甚命引綽斬之綽曰寧殺臣不  
可殺亶至朝堂解衣就刑上復使人問之對  
曰執法一心不敢惜死帝乃釋之帝以綽誠  
直前後賞賜萬計與大理卿薛胄俱名平恕  
然胄原情而綽守法帝晚節用法益峻元會  
衣劔有不齊者御史不劾殺之諫議大夫毛  
思祝諫又殺之帝既喜怒不恒不復依準科  
律信任楊素素復任情不平與鴻臚少卿陳  
延有隙嘗經蕃容館庭中有馬屎又衆僕於  
穽上糲蒲以白帝帝大怒王客令及糲蒲者

皆杖殺之捶延幾死帝遣親衛大都督屈突  
通往隴西檢覆群牧得隱匿馬二萬餘匹帝  
大怒將斬太僕卿以下千五百人通諫曰人  
命至重陛下柰何以畜產之故殺千餘人臣  
敢以死請帝瞋目叱之通又頓首曰臣一身  
分死就陛下句千餘人命帝感悟皆減死論  
擢通爲右  
武侯將軍 **集覽** 也執事謂主執其事者而爲  
我而猶言爾汝也下而不而屬並同掌固官  
名大理寺屬官厭蠱注見陳宣帝太建四年  
元會謂元旦日朝會時鴻臚注見漢武帝太  
初元年糲蒲博局戲名博物志云糲蒲戲老  
子入胡作今人擲之爲戲又注見晉明帝太  
寧三年糲蒲之具屈突代北復姓也屈九勿

通鑑綱目卷之三十一



反分死分扶問 **質實** 棄市注見秦始皇三十四年懍懍危懼貌趙綽

河東人屈突通長安人

**書法** 書律外譏也唐世簿尉不免筆楚則自此始矣

**發明** 昔鄭昌上疏宣帝有曰律令一定愚民知所避姦吏無所弄故法有畫一

律戒貳端古人所以垂之象魏有之邦國者皆是物也民且若此况屬官乎夫所謂屬官者乃周書之所謂謹簡乃儉而六典之大事則從其長者也品秩雖有崇卑要為比肩事主杖之已為不可矧又律外決之乎且所謂律外者抑不知為杖凡幾句

哉若律止三十則出於律外者增之至百可也又增至於千亦可也蓋律有明文正所以為之限制今既聽於律外則任情而行不復以律為拘矣隋文此意惟恐法之不嚴故明示其旨使之自為嚴酷以稱吾馭下之急耳先王忠厚之意殆不若是是豈官有常刑國有常憲之理哉綱目書此其曰論屬官罪聽律外決杖則隋文操切之惡固自不言可知而當時之為屬官尚可不知愧耻而安於其位乎

### 上在國劉昶子居士有罪伏誅

和與帝有舊帝甚親之其子居士任俠不遵法度數有罪帝每原之居士轉驕恣取公卿



子弟雄健者以車輪括其頸而捧之能不屈者為壯士釋而與交黨與三百人多所侵奪或告居士謀為不軌帝怒斬之

**集覽**

任俠注見漢武帝元朔二年

**質實**

不軌

注見漢靈帝光和五年

**書法**

罪未有書其子者書昶子何罪失教也特筆書之垂戒之意深矣

**發明**

不直曰劉居士有罪伏誅而必曰桂國劉昶子者父過愛而縱其子子為惡而累其父是以交貶之也

### 夏四月頒新曆

楊素牛弘等復屬張胄玄曆術帝令素與術數人立議六十一事皆舊法久難通者令劉揮與胄玄辨析之暉一無所答胄玄通者五十四拜太史令令參定新術至是曆成頒之暉等除名

### 秋七月桂州亂遣將軍虞慶則討平之

桂州人李世賢反上議討之諸將數人請行帝顧慶則曰位居宰相爵乃上公國家有賊遂無行意何也慶則恐懼請行卒討平之

### 并州總管秦王俊有罪免



俊幼仁恕喜佛教及為并州總管奢侈好內其妃進毒得疾徵還免官廢妃賜死楊素諫曰秦王之過不至此願陛下詳之帝曰若如公意何不別制天子兒律周公尚誅管蔡况我不及周公安敢

**質實**

并州注見齊明帝建武三年周公尚誅管

勸法乎卒不許

蔡注見漢後主建興九年

**發明**

俊既書有罪免固無可言者隋主妄援周公誅管蔡之事為比夫周公制

禮作樂治致太平至使周家之德仁及草木澤被昆蟲刑措不用者帝皆不以為法而獨取其不得已之一節以為口實可乎且春生秋殺造化不能偏廢然生意常存而不息今不體其生而惟體其殺又從而告諸人曰此天意也是天惟以殺為事耳隋文立論不幸類是臣故因而及之以告後之君子

**以安義公主妻突厥突利可汗**

**考異**

提要作義安公主

突厥突利可汗來逆女帝舍之太常教習六禮妻以宗女安義公主帝欲離間都藍故特厚其禮令長孫晟說之使帥眾南徙居度斤舊鎮錫賚優厚都藍怒曰我大可汗也反不如染干乎於是朝貢遂絕亟掠邊鄙突利伺知動靜輒遣奏聞由是邊鄙每先有備

**覽**

來逆女逆迎也穀梁傳隱二年逆女親者也注親者自來逆之也莊二十四年公如



齊逆女親迎恒事也舍之太常舍臨之於太  
常寺六禮注見晉成帝咸康二年都藍可汗  
之號也名雍虞閭染干突利可汗名亟掠亟  
去吏反頻數也掠音亮注見唐高祖武德二  
年抄

**質實**

可汗注見漢後  
主景耀四年

**書法**

宗女也書公主何據漢武帝元封六  
年以宗室女為公主隋無耻也隋世

以女嫁蠻夷為故常綱目以是為不足為  
之諱也故因其所稱而稱焉安義以宗女  
書公主義成以  
宗女書公主

冬欽州刺史寧長真來朝

